

Headlines

1. प्रधानमंत्री नरेन्द्र मोदी होर अज्ज दिनै 11 बजे अपने माहवार रेडियो कार्यक्रम “मन की बात” दे राएं देश-बदेश च रौह्ने आहले लोकें कन्नै अपने बचार सांझे करडन।
2. लेफ्टिनेंट गवर्नर मनोज सिन्हा होरें आखेआ ऐ जे श्री अमरनाथ जी दी जात्तरा, असल च लोकें दी जात्तरा ऐ। उ’नें आखेआ जे हर इक बसनीक इस पवित्तर धार्मिक जात्तरा दा हित-धारक ऐ।
3. मुख्यमंत्री ओमर अब्दुल्ला होरें जम्मू-कश्मीर गी देसै च गोल्फ सरबन्धी सब्बनें शा बधिया थाहरें चा इक्क बनाने दी अपनी सरकार दी वचनबद्धता गी फही पक्का कीता ऐ। उ’नें आखेआ जे गुलमर्ग, श्रीनगर ते जम्मू आहले गोल्फ कोर्स गी बेहतर बनाने दा कम्म जारी ऐ।
4. जम्मू-कश्मीर नै संरक्षित इलाकें दे प्रबंधन आहले खेत्तर च अब्बल थाहर हासल कीती ऐ। जंगलात मंत्री जावेद राणा होरें इस उपलब्धि लेई वन्य जीवें सरबन्धी मैहकमे दी सराहना कीती।
5. मुख्य सचिव अटल डुल्लु होरें जम्मू-कश्मीर च हर इक परोआर लेई विशिष्ट पन्छान आहली परोआरिक आईडी कायम करने सरबन्धी पैहलकदमी शा पैहले आहली जरूरी तैयारिएं दी समीक्षा कीती।



PM Mann Ki Baat

प्रधानमंत्री नरेन्द्र मोदी होर अज्ज दिनै 11 बजे अपने माहवार रेडियो कार्यक्रम “मन की बात” दे राएं देश-बदेश च रौह्ने आहले लोकें कन्नै अपने बचार सांझे करडन। एह इस कार्यक्रम दी 123मीं किश्त होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज ऑन ए.आई.आर मोबाइल ऐप ते डीडी न्यूज, आकाशवाणी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोंगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ। आकाशवाणी दा क्षेत्रीय समाचार एकांश जम्मू अज्ज रातीं सांझे 10 बजे मन की बात पर इक बशेश परिचर्चा बी प्रसारत करोग।



LG-Amarnath

उपराज्यपाल मनोज सिन्हा होरें औंदी श्री अमरनाथ जी दी यात्रा दे प्रबंधें पर चर्चा करने आसतै नागरिक समाज दे संगइनें दे सदस्यें, धार्मिक नेताएं, निर्वाचित प्रतिनिधिएं ते बपार ते कारोबारी समुदाय कन्नै इक बैठक लाई। मुख्यमंत्री उमर अब्दुल्ला, मुख्य सचिव अटल डुल्लू ते होर दुए परिष्ठ अधिकारिएं बी इस बैठक च हिस्सा लैता। उपराज्यपाल होरें समाज दे बक्ख-बक्ख वर्गें दे सुझाएं दा सुआगत कीता ते पवित्र तीर्थयात्रा इे बवस्थित संचालन गी जकीनी बनाने आसतै

उंदी सक्रिय हिस्सेदारी ते सैहयोग दा आग्रह कीता। उनें आखेआ जे श्री अमरनाथ जी दी यात्रा सबै गै इक आम जनमानस दी यात्रा ऐ, जेह्दे च हर इक बसनीक इस पवित्र तीर्थ यात्रा दा इक प्रमुख हितधारक ऐ।

<><><><><><>

Div.Com IGP

जम्मू दे डिवीजनल कमीशनर रमेश कुमार ते जम्मू दे आइजीपी भीम सेन टूटी होरें भगवती नगर यात्री निवास ते जम्मू रेलवे स्टेशन सनें महत्वपूर्ण थाहरें उप्पर श्री अमरनाथ जी दी यात्रा दी खीरी तैआरिएं दा जायजा लैता। उनें सलाना पवित्र यात्रा च हिस्सा लैने आले तीर्थयात्रिएं गी दित्ती जाने आलिएं सुविधाएं दा जायजा लैने आस्तै भगवती नगर दा दौरा कीता। एह्दे परेंत डिवीजनल कमीशनर ते आइजीपी होरें सबै मैह्कमे आस्सेआ कीते गेदे खीरी इंतजामें दी समीक्षा करने आस्तै मैह्कमे दे प्रमुखें, सरबंधत मैह्कमें दे बड्डे अधिकारिएं ते सुरक्षा बलें कन्नै इक बैठक लाई।

<><><><><><>

CM Golf

मुख्यमंत्री ओमर अब्दुल्ला होरें जम्मू—कश्मीर गी देसै च गोल्फ सरबंधी सब्बनें शा बधिया थाहरें चा इक्क बनाने दी अपनी सरकार दी वचनबद्धता गी फही पक्का कीता ऐ। श्रीनगर च राश्ट्री स्तर दी गोल्फ टूर्नामेंट दे मगरा पुरस्कार बंड्डने आहले समारोह दरान बोलदे होई मुख्यमंत्री होरें खड्डारिएं दा सोआगत कीता ते इस किस्मै दे आयोजन लेई फिक्की दा धन्नवाद कीता। ओमर होरें हाल दिएं चुनौतिएं परैन्त खित्ते च सैलसफा खेत्तर च नमें सिरेया जान भरने च इत्थे औने आहलें दे अनुभवे दी ताकत पर चेचा जोर दित्ता। गुलमर्ग, श्रीनगर ते जम्मू आहले गोल्फ कोर्से च जारी कर्मे पर लोऽ पांदे होई मुख्यमंत्री होरें जकीन दोआया जे जम्मू—कश्मीर गी पक्क गै गोल्फ आहली इक बेह्तरनीन थाहर दे तौर पर स्थापित कीता जाह्ग ते इत्थे औने आहले गोल्फ पेशेवरें गी आलमी स्तर दिआं बेह्तरनीन स्हूलतां उपलब्ध करोआइयां जाडन।

<><><><><><>

Rajouri-Gastro

राजौरी दे कंडी ब्लाक च स्थित धार—साकरी ग्रां च गैस्ट्रोएंटरोलाजी करी घट्टोघट्ट 35 लोक प्रभावत होए न। इंदे चा चऊं मरीजें बी बशेष दिक्खभाल आस्तै जीएमसी जम्मू भर्त्थी करोआया गेआ ऐ, जिसलै के बाकी लोकें गी राजौरी च गै मैडिकल दिक्ख—रिक्ख हासल होआ दी ऐ।

<><><><><><>

Rana Dachigam

जम्मू-कश्मीर दे जंगलात मैहकमे नै प्रबंधन प्रभावशीलता मूल्यांकन अभ्यास तैहत डाचीगाम नेशनल पार्क लेई 92 इशारिया 9-7 फीसद स्कोर दी उपलब्धि हासल कीती ऐ। एह अभ्यास पर्यावरण, जंगलात ते जलवायु परिवर्तन मंत्रालय तैहत भारत दे वन्य जीवें सरबंधी संस्थान आसेआ करोआया गेआ हा। जंगलात मंत्री जावेद राणा होरें इस बड़्डी उपलब्धि लेई वन्यजीवें सरबंधी मैहकमे दे अधिकारिणं दी सराहना कीती। उ'नें आखेआ जे जम्मू-कश्मीर दे होरनें इलाकें च बी इस उपलब्धि थमां सबक लेंदे होई इस्सै मय्यार दे कम्म कीते जाने लोड़चदे न। मंत्री होरें इब्बी आखेआ जे डाचीगाम नेशनल पार्क, मुख्य भरै दे 438 संरक्षित इलाकें च, इन्नी बधिया कारकरदगी दस्सने आहले इलाके दे तौर पर उभरियै सामने आया ऐ।

<><><><><><>

CS Family IDs

मुख्य सचिव अटल डुल्लु होरें कल श्रीनगर आहले सिविल सैक्रेटेरिएट च इक उच्ची सतह दी बैठक लाइयै जम्मू-कश्मीर च हर इक परेआर लेई विशिष्ट पन्छान आहली परोआरिक आईडी कायम करने शा पैहले आहली जरूरी तैयारिणं दी समीक्षा कीती। इस पैहल दा मकसद सार्वजनिक सेवाएं दी दस्तयाबी गी चुस्त-दुरुस्त बनाना, लाभार्थिणं दी पुज्ज दा विस्तार करना ते बक्ख-बक्ख सरकारी मैहकमे च योजना ते निगरानी लेई इक भरोसेमंद जरिये गी स्थापित करना ऐ। बैठका दरान मुख्य सचिव होरें विशिष्ट पन्छान आहली ऐकड़ी परोआरिक आईडी दी सकारात्मक समर्थ उप्पर लोऽ पाई।

<><><><><><>

Ramban Tribals

जिला प्रशासन रामबन आस्सेआ “धरती आबा जनजातिय ग्राम उत्कर्ष” अभियान दे तैहत जागरूकता कैप दा सरिस्ता कीता गेआ। बक्ख-बक्ख जनजातीय खेत्तरें च आयोजित इस शिविर दा मकसद जनजाति आबादी तगर कल्याणकारी योजनाएं दी खीरले माहनु तगर पुज्ज जकीनी बनाना ऐ। सेहत, आयुष ते पशुपालन सनें मैहकमे मुफ्त सेहत जांच सेवा ते पशु चिकित्सा सेवा प्रदान कीतियां। इस पैहल ने परतक्ख पुज्ज, जागरूकता ते लाजमी सरकारी सेवाएं तगर पुज्ज दे राएं प्रशासन ते जनजाति समुदायें दे बश्कार सरबंधें गी मजबूत कीता।

<><><><><><>

Dogri Song

कुंवर वियोगी मेमोरियल ट्रस्ट, डोगरी संस्था जम्मू ते जेएंडके एक्स सर्विसमेन लीग आसेआ डोगरी, हिंदी ते अंग्रेजी च जय डोगरा नांऽ दा पैह्ला देशभक्ति गीत जारी कीता गेआ। एह गीत, कश्मीर दे रक्षक खोआने आहले ब्रिगेडियर रजिंदर सिंह जम्वाल ते 1947 च उं'दे कन्नै कश्मीर दी राख्खी करदे होई सर्वोच्च बलिदान देने आहले 100 डोगरा जोद्धाएं गी समर्पित ऐ। कुंवर वियोगी हुंदी रचना थमां प्रेति इस गीत गी ब्रिज मोहन होरें बड़े असरदार ढंगै'नै तैयार कीता ते इस गीत गी बीएसएफ दे जवान रियाज़ अहमद होरें कल डोगरी भवन जम्मू च लोआए गेदे इक समारोह दरान गाया।

<><><><><><>